

ATV-t qamuteralaallu inuussutissarsiutigalugu atornissaannut akuersissutaasumik allagartaqalernissaq pilerseqqullugu Naalakkersuisut Naalagaaffimmut attaveqarnissaannik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Henrik Fleischer, Siumut)

Akissuteqaat

(Ineqarnermut Attaveqaatigiinnermullu Naalakkersuisoq)

Siullermeerneqarnera

Aallarniutigalugu ATV-t qamuteralaallu inuussutissarsiutigalugu atornissaannut akuersissutaasumik allagartaqalernissaq pilerseqqullugu Naalakkersuisut Naalagaaffimmut attaveqarnissamik peqquneqarnissaannik Inatsisartut aalajangiiffigisassaattut siunnersuummut saqqummiunneqartumut Naalakkersuisut sinnerlugit qujavunga.

Allanut ataqatigiissillugu suliffeqarfinnut inuussutissarsiutinut ataqatigiissillugu ilaasunik assartuussisartunut piumasaqaateqarpoq. Imarsionermut tunngatillugu umiarsuaatilinnut ilaasunik angallassisartunut piumasaqaateqarpoq. Nunami aqqusinertigut angallannermut inatsit inuussutissarsiutigalugu ilaasunik assartuussinermut piumasaqaateqarnissamut periarfissiivoq.

Inuussutissarsiutigalugu ilaasunik angallassinermut piumasaqaateqarnek, aqqusinikkut angallannermut inatsimmi piumasaqaatinik nalinginnaasunik sukannernerulersitsinerusussaassaaq. Qamuteralannik ingerlaarnissamut aqqusinikkut angallannermut inatsimmi piumasaqaatit annikitsuaraapput.

ATV-it aqqusinikkut angallannermut inatsimmi immikkoortutut inissisimatinneqanngillat. Taamaattumik isumannaallisaanerup pitsanngorsarnissaanut alloriarneq siulleq tassaassaaq ATV-it qamuteralaallu pillugit maleruagassanik iluarsiinissaq. Tamanna pillugu Naalakkersuisut Assartuussinermut Ineqarnermullu ministeriaqarfik ataavartumik oqaloqatigiittarnerit ingerlappaat. Tamatuma kingorna ATV-it qamuteralaallu inuussutissarsiutigalugu atornissaannut akuersissuteqartarnernut aqqissuussinissamut periarfissat misissorsinnaassavagut.

Angallatini minnerusuni ilaasunik assartuussinermut piumasaqaatit taamaaqataannik ATV-nut qamuteralannullu aqqissuussineq, suliaqartuusunut ATV-it qamuteralaallu inuussutissarsiutigalugit atuisunut tamaginnut atuuttussaassaaq. Taamaalilluni takorloorneqarsinnaavoq suliaqartuusunut piumasaqaateqassasoq, aammalu ilinniartitaanek

ingerlanneqartussaassalluni.

Taamaattumik Naalackersuisut allannguutissatut siunnersuut manna saqqummiuppaat:

”ATV-t qamuteralaallu atorlugit angalaarnermut maleruagassat iluarsanneqarnissaat, ilanngullugu ATV-t qamuteralaallu inuussutissarsiutigalugu atornissaannut maleruagassiineq, siunertaralugu Naalackersuisut Naalagaaffimmut attaveqarnissaannik peqquneqarnissaannik Inatsisartunut aalajangiiffigisassaattut siunnersuut.”

Matumuuna siunnersuut Inatsisartunut suliassanngortippara.